

**BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA**

**Odbor za ekonomsku i razvojnu politiku,  
finansije i budžet**

Broj: 02/11-02-9-1670/15-1  
Sarajevo, 26.11.2015. godine

**DOMU NARODA  
PARLAMENTA FEDERACIJE BIH**

Na 4. sjednici Odbora za ekonomsku i razvojnu politiku, finansije i budžet Doma naroda Parlamenta Federacije BiH održanoj 26.11.2015. godine razmatrane su sljedeće tačke dnevnog reda:

- 1. Nacrt Budžeta Federacije Bosne i Hercegovine za 2016. godinu**
- 2. Nacrt Zakona o izvršavanju Budžeta Federacije Bosne i Hercegovine za 2016. godinu**
- 3. Dokument okvirnog budžeta Federacije Bosne i Hercegovine za period 2016. - 2018. godina**

Na osnovu člana 51. Poslovnika o radu Doma naroda Parlamenta Federacije BiH ("Službene novine Federacije BiH", broj 27/03) Odbor za ekonomsku i razvojnu politiku, finansije i budžet podnosi Domu naroda sljedeći:

**I Z V J E Š T A J**

**1. Nacrt Budžeta Federacije Bosne i Hercegovine za 2016. godinu**

Predstavnik predlagača je detaljno obrazložio Nacrt Budžeta Federacije Bosne i Hercegovine za 2016. godinu te posebno istakao da je tekuća potrošnja generalno smanjena ali da je porastao iznos sredstava za otplatu vanjskog duga. Članovi Odbora su istakli zadovoljstvo što se Budžet Federacije Bosne i Hercegovine za 2016. godinu razmatra i donosi u redovnoj proceduri, ali isto tako uočili niz problema koji su između ostalog vezani za donošenje, odnosno nametanje zakona od strane Vlade Federacije Bosne i Hercegovine kantonima bez povratnih informacija o realnim finansijskim mogućnostima provođenja istih. Iz tog razloga je predloženo da se sve obaveze kantona nastale na osnovu donošenja ovakvih zakona pripišu i evidentiraju kao unutrašnji dug Federacije Bosne i Hercegovine. U raspravi je također, istaknut problem neangažovanja i ne korištenja svih mehanizama naplate i prikupljanja poreza i doprinosa od strane Vlade Federacije BiH što između ostalog za posljedicu ima ogroman pritisak i opterećenje na Federalni penzijsko-inaliski fond, posebno imajući u vidu i reforme koje predstoje ovom sektoru. Ostale pojedinačne primjedbe, sugestije i prijedloge članovi Odbora će iznijeti u raspravi na sjednici Doma naroda.

Imajući u vidu sve navedeno, članovi Odbora predlažu Domu naroda slijedeći:

## **Z A K L J U Č A K**

**Odbor za ekonomsku i razvojnu politiku, finansije i budžet predlaže Domu naroda Parlamenta Federacije Bosne i Hercegovine da razmotri i prihvati Nacrt Budžeta Federacije Bosne i Hercegovine za 2016. godinu uvažavajući sve primjedbe, prijedloge i sugestije iznesene na sjednici Doma naroda kao i one dostavljene u pisanoj formi.**

### **2. Nacrt Zakona o izvršavanju Budžeta Federacije Bosne i Hercegovine za 2016. godinu**

Predstavnik predlagača upoznao je članove Odbora sa predloženim tekstom nacrta Zakona. Članovi Odbora nisu imali primjedaba te predlažu Domu naroda da razmotri i prihvati Nacrt Zakona o izvršavanju Budžeta Federacije Bosne i Hercegovine za 2016. godinu.

### **3. Dokument okvirnog budžeta Federacije Bosne i Hercegovine za period 2016. - 2018. godina**

Predstavnik predlagača je istakao da navedeni dokument predstavlja prateći dokument Nacrta Budžeta Federacije Bosne i Hercegovine za 2016. godinu. Članovi odbora nisu imali konkretnih primjedaba i sugestija te predlažu Domu naroda da Dokument okvirnog budžeta Federacije Bosne i Hercegovine za period 2016. - 2018. godina razmotri i primi k znanju.

Za izvjestioca na sjednici Doma naroda ispred Odbora za ekonomsku i razvojnu politiku, finansije i budžet određen je predsjednik Odbora Muhamed Kozadra.

**PREDSJEDNIK**  
Odbora za ekonomsku i razvojnu  
politiku, finansije i budžet

**Muhamed Kozadra, s.r.**